


# TEZĂUR LITURGIC

**4 IUNIE**

# ACATISTUL SF. MIRONOȘIȚE MARIA ȘI MARTA



**MOSCOVA, 2000**



# **Акафист**

## **СВЯТЫМ ПРАВЕДНЫМ**

### **Марфе и Марии,**

### **сестрам праведного Лазаря**

#### **Кондак 1**

---

Избранныя от Бога служительницы новыя благодати, праведнаго Лазаря боголюбивыя сестры, Марфо и Марие, вы деянием и разумением в вере и любви Христу последовали есте и ныне с лики святых жен пребываете, наслаждающесе райских красот и веселия. Темже, яко имущия дерзновение ко Господу, Того прилежно молити от бед и скорбей и падений греховных избавити нас, да вами научившесе угождати Христу Богу, не престанем со умилением взывати Ему: Аллилуиа.

#### **Икос 1**

---

Ангелов и человек Царь и Господь, доброту душ ваших провидев и до конца вас возлюбив, во дни земной жизни Своея благословенный дом

ваш посещаше и брата вашего Лазаря от мертвых воскреси. Мы же грешнии, таковое человеколюбное снисхождение Его воспоминающе, во умилении сердец наших вопием вам тако:

Радуйтесь, всем сердцем, всею душою и всею мыслию вашею Бога возлюбившия;

радуйтесь, любовь вашу не словом или языком, но делом и истиною явившия.

Радуйтесь, любовию веру во Христа Сына Божия от Отца Небеснаго снискавшия;

радуйтесь, верою, послушанием, делами любви и милосердия Ему послужившия.

Радуйтесь, тем Царствие Небесное наследовавшия;

радуйтесь, дев непорочных и жен целомудренных похвало и украшение.

Радуйтесь, Марфо и Марие, образ веры и любви нам показующия.

## **Кондак 2**

---

Ведяще, праведныя жены, яко Господь, не имый где главы подклонити, придет к вам, потщалися есте в дому вашем Его, яко

Божественнаго Учителя, с верою и любовию послушати и со усердием многим послужити Ему. Темже научаете и нас Ему, яко Богу, нас ради воплотившемуся, неленостно служити и благоговейно воспевати: Аллилуиа.

## Икос 2

---

Научая нас и страннолюбия не оставляти, и о слове Божиим усердно прилежати, не о хлебе бо едином жив будет человек, но о всяком слове Божиим, Господь и Учитель наш и службы Марфы трудолюбныя не отверже, и Мариино седение у ног Его попремногу ублажи. Темже и мы боголюбивей двоице оной воспоим:

Радуйся, Марфо, Христа, нас ради воплотившагося, в дому твоём приявшая;

радуйся, в служении твоём на потребу плоти Его не отверженная.

Радуйся, и нас делами милосердия служити Ему научающая;

радуйся, Марие, у ног Иисусовых словом уст Его насыщавшаяся.

Радуйся, единое на потребу, яко благую часть, избравшая;

радуйся, ревности ради о слышании словес Господних со блаженными Им сопричтенная.

Радуйтесь, Марфо и Марие, образ веры и любви нам показующия.

### **Кондак 3**

---

Силою Божественною укрепляеми, унынием не уязвились есте, егда узрели брата вашего болезнию лютою истощаема, но к Целителю недугов, Господу Иисусу, со упованием послали есте, глаголюще: Господи, егоже любиши, болит. Сим последующе, и мы во всяком обстоянии унынию да не предадимся, со упованием Христу Богу вопиюще: Аллилуиа.

### **Икос 3**

---

Любляше Иисус Марфу и сестру ея и Лазаря и, веру их в грядущее Царствие жизни вечныя испытуя и утверждая, рече: сия болезнь несть к смерти, но к славе Божией, да прославится Сын Божий ея ради. Вы же, о боголюбивыя сестры, и пред лицом смерти брата вашего верою и любовью ко Христу духом горяще, в Божественней силе Его не усомнились есте. Сего ради примите от нас похваления таковая:

Радуйтесь, во уныние безнадежное во обстоянии и скорби не впадшия;

радуйтесь, обремененных скорбьми житейскими тем ободряющия.

Радуйтесь, в печали вашей ко Врачу душ и телес, Господу Иисусу, со смиренным упованием помыслы своя обратившия;

радуйтесь, лица Его не видяще, во благой покорности Ему пребывшия.

Радуйтесь, во испытании сем веру крепку, яко Авраамову, явившия;

радуйтесь, в злостраданиях терпение твердое, яко Иов, показавшия.

Радуйтесь, Марфо и Марие, образ веры и любви нам показующия.

#### **Кондак 4**

---

Ведая, яже хочет сотворити, Всемогущий Господь и Спас наш, рече учеником Своим: Лазарь, друг наш, успе, но иду, да возбужу его; научая всех во свете лица Божия ходити и Подателю жизни воспевати: Аллилуиа.

---

## Икос 4

Многие от иудей приидоша к Марфе и Марии, да утешат их о Лазаре, брате их. Сестры же, отбегая их, яко не имущих о Христе Иисусе упования. Марфа к Единому Утешителю стопы своя с радостию направи, егда Той Вифании достиже. Таковую крепкую любовь сестер Лазаревых ко Христу и веру их зряще, радостными гласы воспоим им таковая:

Радуйтесь, добротою душ ваших неверных иудеев окамененныя сердца покорити возмогшия;

радуйтесь, не суетному унынию, но Божию благоволению себя предавшия.

Радуйтесь, на единую благодать Христову в печали вашей надежду возложившия;

радуйтесь, в сретение Его со тщанием стопы ваша направившия.

Радуйтесь, во уповании вашем от Могущаго спасти оправданныя;

радуйтесь, утешения в скорбех не от людей, но от Бога искати нас научающия.

Радуйтесь, Марфо и Марие, образ веры и любве нам показующия.

## Кондак 5

---

Марфа блаженная, егда сретє Господа, утешения от Него ищущи, рече: Господи, аще бы Ты зде был, не умерл бы брат мой. Но и ныне вем, яко елика аще попросиши от Бога, даст Тебе Бог. Емуже от всея души нашея и мы вопиєм: Аллилуиа.

## Икос 5

---

Божественное Свое смотрение о нашем спасении показуя, Господь Иисус, яко жизни и смерти Владыка, благоволи рещи тебе, блаженная Марфо: воскреснет брат твой. И паки: веруй в Мя, аще и умрет, оживет. Вериши ли сему? - вопроси тя. Ты же отвеща Ему: ей, Господи, верую, яко Ты Христос Сын Божий, грядущий в мир. Сего ради, вере во Христа Сына Божия тобою научаемии, восхваляем тя сиче:

Радуйся, блаженная Марфо, обетование о воскресении брата твоего от Самого Жизнодавца услышавшая;

радуйся, яко вопрошенная от Него о вере твоей, не плоти и крови, но гласа Отца Небеснаго послушавшая.

Радуйся, яко от Него наученная, Христа Сына Божия твердо исповедала еси;

радуйся, яко тем камень веры, на немже созда Господь Церковь Свою, явившая.

Радуйся, во исповедании твоём Петру, первоверховному апостолу, уподобившаяся;

радуйся, равноапостольнаго ублажения воистину достойная.

Радуйтеся, Марфо и Марие, образ веры и любви нам показующия.

### **Кондак 6**

---

Трости надломленные не преломляй, Человеколюбец Господь, егда виде Марию и пришедшия с ней иудеи плачущия, якоже любляше Лазаря, прослезися Сам. Да и мы немощнии, в скорбех суще, бестрепетно к Нему со слезами притекаем, вопиюще Ему: Аллилуиа.

### **Икос 6**

---

Воистину благословен о брате твоём плач твой, Марие, егоже видя, прослезися Иисус. Сего ради со умилением ублажаем тя сице:

Радуйся, боголюбивая Марие, в серафимстей любви твоей ко Господу и к сродникам любви своея не угасившая;

радуйся, плачем твоим о Лазаре нас, во окаменении сердечном пребывающих, обличившая.

Радуйся, Христа Бога слезы о падшем создании Своим источити подвигшая;

радуйся, в слезах Господа Иисуса, немощем нашим состраждуща, елей утешения всем плачущим и болезнующим показавшая.

Радуйся, и сама в скорбех наших сострадати нам могущая;

радуйся, с сестрою твоею Марфою милосердия сестрам первоначальница богоугодная.

Радуйтеся, Марфо и Марие, образ веры и любви нам показующия.

### **Кондак 7**

Всеведый по Божеству Своему, человеческое естество показующе, о Лазаре вопрошал еси, Господи Иисусе: где положисте его. И камень от гроба взяти повелел еси, да возсмердением смерти заградятся неверных уста. Мы же,

вернии, со дерзновением Тебе, победити смерть пришедшему, вопием: Аллилуиа.

### **Икос 7**

---

Немощь естества человеческого являючи, сестра умершаго, Марфа, глагола Иисусу: Господи, уже смердит: четверодневен бо есть. Мария же, зряще камень отвален от гроба, в молчании пребываше. Сему Мариину молчанию со умилением внимающе, с Марфою же маловерие свое Господу дерзновенно исповедующе, воззовем к ним таковая:

Радуйся, Марие, яко ко гробу смердящаго в претрепетном молчании за Христом пришедшая; радуйся, яко сим всех нас в послушание веры разум покоряти научившая.

Радуйся, Марфо, яко немощь веры нашея превозмогати научающая;

радуйся, яко всем нам: ей, Господи, верую, яко Ты Христос, Сын Божий, глаголати указавшая.

Радуйтесь, блаженныя сестры, в немощех душ и телес ваших от Христа не отступившия и Ему любовьию последовавшия;

радуйтесь, на высоту благодатного разумения Самим Всеведцем возведенныя.

Радуйтеся, Марфо и Марие, образ веры и любви нам показующия.

### **Кондак 8**

---

Славу Свою, яко Единородного от Отца, всем верным являя, хвалу Отцу Своему воздав, Иисус гласом великим возва: Лазаре, гряди вон. И бездыханный, Дающего дыхание послушав, от смерти восста и от гроба изыде; да чудо сие зряще, купно и мы с ним Победителю смерти воспоим: Аллилуиа.

### **Икос 8**

---

Чудо велие и страшное сотвори Христос Бог наш, Лазаря четверодневного от мертвых воздвигнув. Да и нас всех веру в Него, яко Сына Божия, утвердит, бессмертие души и общее всех воскресение уверяя. Мы же, божественное поклонение Сотворшему сие воздающе, ублажим сестры воскрешенного Им и воззовем к ним сицевая:

Радуйтеся, праведного Лазаря сестры, Христа нелицемерне возлюбившия;

радуйтесь, Христом за верность вашу возлюбленные.

Радуйтесь, общее воскресение прежде страстей Христовых в вере узревшия;

радуйтесь, верою вашею и нашу веру укрепляющия.

Радуйтесь, ученицы Христовы достославныя; радуйтесь, лика апостольскаго истинныя причастницы.

Радуйтесь, Марфо и Марие, образ веры и любви нам показующия.

### **Кондак 9**

---

Сыны тьмы, зря умершаго и гласом Божиим от тления восставшаго, в ожесточении сердец не вероваша Христу даже до сего дне, во ослеплении суще. Мы же, сих безумию не прилагающеся, но в общее воскресение по гласу Сына Божия верующе, Ему, яко Жизнодавцу, велегласно и вседушно возопиим: Аллилуиа.

### **Икос 9**

---

Преславная и страшная в Вифании сотворив, Иисус, прежде шести дней Пасхи, паки прииде в весь сию. И сотвориша Ему вечерю, и бе Лазарь

един от возлежащих с Ним. Вы же, присноблаженные сестры, Подателю всяческих благодарни суще, Марфа служаше Ему всеусердне, Мария же миро на нозе Его возлия. Сего ради, в радость вашу внити желающе, и мы со умилением зовем вам:

Радуйтесь, богомудрыя жены, хвалы и благодарения благодеющему Господу преисполненные;

радуйся, Марфо трудолюбная, се уже другой раз на вечери Господу послужившая.

Радуйся, в благодарнем служении сем Господом милостивно приятая;

радуйся, Марие, Сладчайшему Иисусу нозе миром многоценным помазавшая.

Радуйся, во обличение Иудиных злохулений похваления Иисусова сподобившаяся;

радуйся, яко многоценнаго мира на нозе Христовы возлиянием и нас благолепие дому Божия любити и о том прилежати поучаеши.

Радуйтесь, Марфо и Марие, образ веры и любви нам показующия.

## Кондак 10

---

Марфе и Марии, вернии, подражающе, кийждо во своем чину, ко Христу Спасу припадем и, просяще от Того исцеления немощей наших и от сна греховнаго воскрешения, благодарными усты воспоим Ему: Аллилуиа.

## Икос 10

---

Вернии до конца во служении вашем Христу во днех плоти Его пребывшия и самовидцы страстей Его быти сподобившиися, к погребению Воскресителя Лазарева, славныя Марфо и Марие, посреде мироносиц явились. С ними предстояще ныне престолу славы Божия, молитвами вашими к песнопенному тех лику совокупите и нас, ваши подвиги прославляющих:

Радуйся, Марфо, в твоём Христу многопопечительном служении, якоже и во исповедании, поревновавшая;

радуйся, странноприимницам и милосердия сестрам подвигоположница.

Радуйся, Марие, возлюбленному ученику Христову Иоанну в пламенной любви к Тому уподобившаяся;

радуйся, непорочных дев, Христу в житии своем уневестившихся, руководительница неложная.

Радуйтесь, боголюбивыя сестры, и деятельным житием, и вниманием сердечным последования Христу ревнительницы изрядныя;

радуйтесь, на обоих сих путях угождения Господу жити братии вкупе мудре нас научающия.

Радуйтесь, Марфо и Марие, образ веры и любви нам показующия.

### **Кондак 11**

---

Кий глагол довлет по достоянию воспети Воскресения Христова радость всемирную, еяже вы, со прочими женами мирноносицами, в сей велий и святыи день причастилися есте; темже и мы, Воскресения Христова величие боголепное славяще, поим Христу: Аллилуиа.

---

## Икос 11

Всякое искушение преити молящися и живот вечный уллучити хотящи, яко верныя ученицы Христовы, каяждо во своем пути, обаче единым духом веры и любви Ему поработали есте, отонудуже и радостей во Царствии Его сподобилися есте. Сего ради, труды и подвиги ваша воспоминающе и славе вашей во Царствии Христовом радующеся, воспеваем вам таковая:

Радуйтеся, верныя ученицы Христовы, не человеком, но Богу в житии вашем угодившия;

радуйтеся, нищетою духовною Царствие Небесное стяжавшия.

Радуйтеся, духом кротости землю обетования наследовавшия;

радуйтеся, милосердия делами милостей от Господа во Царствии Его сподобившияся.

Радуйтеся, сердцем чистым Бога Слова зрящия;

радуйтеся, исповедницы веры Христовы, мзду многу на небесех приявшия.

Радуйтеся, Марфо и Марие, образ веры и любви нам показующия.

## Кондак 12

---

Благодатию Всемилоствиваго Бога прияли дерзновение велие к Нему, о блаженныя сестры. Моления ваша и прошения о нас грешных к престолу славы Его вознесите, да спасаеми предстательством вашим, Воскресшему и вся с Собою воскресившему ангельскую песнь воспоим: Аллилуиа.

## Икос 12

---

Поюще ныне со всеми небесными силами трисвятую песнь дивному во святых Своих Богу, о преблаженныя сестры Лазаревы, призрите с высоты небесныя на нас грешных, волнами моря житейскаго обуреваемых, тихаго пристанища жаждущих и вас сице любовью величающих:

Радуйтеся, на небеси во славе со ангелы и всеми святыми царствующия;

радуйтеся, и на земли в Церкви Христовой песненно прославляемя.

Радуйтеся, яко звезды небесныя во тьме века сего добродетельми вашими сияющия;

радуйтеся, Богом данныя нам в житии нашем наставницы.

Радуйтесь, милосердия служением Христу первоначальницы;

радуйтесь, теплыя о нас к Богу молитвенницы.

Радуйтесь, Марфо и Марие, образ веры и любви нам показующия.

### **Кондак 13**

---

О предивная боголюбивая двоице, верныя ученицы Христовы, Марфо и Марие преславныя, огонь любви и веры в душах ваших возжегшия и сих ради в Царство славы силою Воскресшаго вшедшия, испросите нам у Христа Бога нашего помощи путями вашими zde на земли жительствовати, да во обители Отца Небеснаго вселившеся, купно с вами и всеми святыми и мы на престоле славы Сядящему воспоим ангельскую песнь: Аллилуиа.

*Этот кондак читается трижды, затем читается икос 1-й «Ангелов и человек...» и кондак 1-й «Избранныя от Бога...».*

### **Молитва 1**

---

О святыя и всехвальныя ученицы Христовы, Боголюбивыя Марфо и Марие! Умолите возлюбленнаго вами и вас возлюбившаго

Сладчайшаго Иисуса, Егоже вы исповедали есте, Христа, Сына Божия, да даст и нам грешным, грехов, оставление, в вере правой нелицемерное и твердое стояние. Вселите в сердца наша дух страха Божия, смиренного на Бога упования, терпения и к ближним милосердия. Избавите нас молитвами вашими от искушений житейских, бед и напастей, да тихое и мирное житие поживше zde, с помыслы непорочными и сердцем чистым, с дерзновением веры и упования предстанем на оный Страшный Суд и, добрый ответ на нем воздавше, радости вечныя в Царствии Небеснем сподобимся. Аминь.

## **Молитва 2**

---

О блаженныя и святыя жены, верою и любовью Христу Богу последовавшия и во обители Отца Небеснаго вселившиися! К вам ныне аз, грешная, (имярек) прибегаю и смиренно молю: научите мя и помозите ми ходити пред Богом путыи вашими непреткновенно и вечную купно с вами жизнь наследовати.

О Марфо праведная, твердым исповеданием веры твоя Христу угодившая, укрепи слабую веру мою. О службе Господу и братьям

нелицемерне и всеусердне прилежавшая, помози и мне служение мое безропотне и вседушевно проходити. Сестру твою иногда, в скорби сушу, ко Христу возвала еси, отая рекши: Учитель пришел есть и глашает тя. Ныне убо предстани мне в трудный час испытания веры и любви моя и в глубине сердца возвести ми, яко Господь Иисус незримо грядет, да путем испытаний привлечет мя к Себе! Испроси мне, о мати святая, у Господа нашего силу и крепость, да воставши скоро, притеку к Нему, поклонюся Ему и в смиренней любви Его мир и спасение души моей обрящу.

И ты, о Боголюбивая Марие, у ногу Иисусову единое на потребу обретшая, помолися Ему благую часть спасаемых и мне, грешней, улучшить. Миро благовонное в дар благодарения Христу Жизнодавцу принесшая, умоли ныне Его и души моей подати миром молитвы и покаяния слезы, чистоты и добрых дел благоухание, тако да во обновленное всеми сими сердце мое Господь приидет и обитель Себе сотворит.

К вам, о святые праведныя жены, Марфо и Марие, припадаю и смиренно молю: не оставите мя в дни тяжких испытаний, да не соблазнюся тленными и красными мира сего, наипаче же в

час горький разлучения души моя с телом, предстаните мне и общаго Владыку нашего умолите, да призрит на мя во оскудении сил моих милостивным оком и, простив вся прегрешения моя, возставит мя к жизни нескончаемей во блаженных обителях Отца Небеснаго. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
НЕБО